

ՄՈՒՐԱՆԻ ԴԱՎՐԻՇԻ ՀԵՔԻԱԹԸ / Հայ ժողովրդական հեքիաթներ, Հատոր VIII / Գուգարք (Լոռի), Լոռու բարբառ (խոսվածք)

Ըլել ա, չի ըլել՝ մի դուքանչու տղա: Օրերի մի օրը դրան պատահել ա մի դավրիշ: Էդ դավրիշը Էդ տղի մոտ ծառայելիս ա ըլել, միշտ կրակի մոխիրը դուրս հանելիս ա ըլել. անումը դրել են՝ Մոխրահան դավրիշ:

Օրերի մի օրը դավրիշը Էդ տղին ասում ա.— Արի դու ձեր թքավորի ախչիկը ուզե:

Նա էլ ասում ա.— Ինչպե՞ս կարելի ա, որ թքավորը ինձ ախչիկ տա. ես մի դուքանչի մարդ եմ: Դավրիշն ասում ա.— Ես ընենց բան կանեմ, որ թքավորի ախչիկը ինքը իրան ոտով կգա քու կուշտը:

Տղեն ասում ա.— Եփոր նա գա, ես էլ կընդունեմ:

Դավրիշը գիր ա անում, Էդ ախչիկը քշերները գալիս ա Էդ տղի կուշտը: Մի վախտ անցնում ա, ախչիկը Էրկուֆոքիսանում ա: Թքավորը տենում ա, ասում ա.— Ախչի՛, Էդ ումի՞ց ա:

Ասում ա.— Փլան դուքանչուց ա:

Թքավորը հարցնում ա, թե.— Նա գեր քու կո՞ւշտը, թե դու գնեիր:

Ախչիկն ասում ա.— Ե՛ս գնեի:

— Էդ ո՞նց ա, որ դու գնեիր:

Ասում ա.— Քշերը իմ օթախումը քնած վախտս մեկ էլ տենում ի, որ չորս պատն էլ կրակ դառավ, ու մի քուչա բաց էլավ:

Էն քուշով փախչեի, գնեի, տենեի Էն տղի դուքանումն եմ, ընդի էլ ո՛նչ կրակ կար, ո՛նչ մի բան էլա: Ըտի մնեի, էլեդ քշերը եդ գեի:

Թքավորն ասում ա.— Ախչի՛, կարա՞ս Էն տղին խաբես, բերես ըստի:

Ախչիկն էլ ասում ա.— Տենանք: Մեկ էլ որ գնամ, իրան կասեմ, բալի կարենամ բերեմ:

Ախչիկը մի հետ էլ գնում ա, Էդ տղին ասում ա.— Իմ ոտը ծանդոն ա, հմի էլ դու արի, ես մեղք եմ, ամեն հետ ես եմ գալի:

Էդ տղեն ասում ա.— Լա՛վ, էքուց ըիկուն ես կգամ:

Էդ տղեն դավրիշին կանչում ա, ասըմ ա, թե.— Դավրի՛շ, նրա ոտը ծանդոն ա, կարում չի գա, կարելի՞ ա ես գնամ:

Դավրիշն ասում ա.— Շատ լավ, ըիկունը,— ասում ա,— գնալիս կգաս իմ կուշտը:

Գնալու վախտը գնում ա Դավրիշի կուշտը:

Ասում ա.— Դավրի՛շ, գնում եմ, ի՞նչ ես ասում:

Դավրիշը դրա ունքերին սուրմա ա քսում, ասում ա.— Գնա՛, էլ չես Էրևալ, գնա համարձակ մտի ամառաթը, էլ քի օչով տենալ չի:

Էդ տղեն գնում ա, մտնում ա Էդ ախչկա օթախը: Օչով նրան տենում չի, Էդ ախչկա համա հաց են բերում, մի աման էլ կերակուր: Դեռ Էրկու թիքա ախչիկը չըկերած՝ կերակուրը հատնում ա: Իրան դարավաշին ասում ա.— Ի՛նչ քիչ ես բերել, գնա էլի բի:

Գնում ա, բերում: Էդ վախտն էլ Էրկու թիքա վեր ա ունում. հատնում ա:

Ասում ա.— Ախչի՛, էլ բի՛:

— Թքավորի ախչիկն ապրած կենա,— ասում ա դարավաշը,— Էրկու բաժին կերել ես, դու կշտացա՞ր ոչ:

Ամոթու էլ բան չի ասում, սոված ա մնում: Եփ դարավաշը դուս ա գնում, Էդ տղեն ախչկան Էրևում ա:

Ախչիկն ասում ա.— Դու ըստի ի՞ր, ընդուր կշտանայի ոչ:

Եղնա էդ ախչիկը դուս ա գնում, տղին թողում ա օթախումն ու դուռը դրսից փակում: Գնում ա հորը ասում.— Տղեն էկել ա, հրեն իմ օթախումը:

Թքավորը մարդ ա դրգում, որ բռնեն, տանեն իրան կուշտը: Գալիս են բաց անում, տենում են, որ օքմին չկա:

Գնում են թքավորին ասում, թե.— Օքմին չկա:

Թքավորն էլ ասում ա.— Ինչպե՞ս չէ, սուտ ա՞ ասում իմ ախչիկը: Գնացեք խոտ ածեք օթախի մեջը ու կրակ տվեք, ըտի մի հնարք կա:

Գնում են խոտ ածում, կրակում: Էդ տղեն որ քրտնում ա, ձեռը ըսենց էրեսին ա քսում, սուրմեն վեր ա գալի, թլիսմ անցնում ա, տենում են, որ հրեն ընդի մի ջահել տղա կազնած: Ձեռիցը բռնում են, տանում են թքավորի կուշտը: Թքավորն ասում ա.— Դու քանի՞ գլխանի ես, որ ըտենց բան ես անում:

Ասում ա.— Թքավորն ապրած կենա, ինչ ուզում ես արա, ես եմ արել:

Թքավորը հրաման ա տալի, թե.— Տարեք դրան խեղդեցեք:

Դրան տանում են, որ խեղդեն, Դարվիշը իմանում ա, թքավորի ջեֆիցը անգին տերօդորմին հանում ա ու իրան նաղիրի կերպարանքով գնում ա էն խեղդող մարդկանց կուշտը:

Ասում ա.— Թքավորի օդորմութինը հասել ա, է՛ս էլ տերօդորմիան, վեր թողեք:

Դրան վեր են թողում, գնում ա իրա դուքանը:

Գալիս են, թքավորը հարցնում ա.— Խեղդեցի՞ք:

Ասում են.— Չէ՛:

Ջիգրվում ա.— Խի՞:

Թե, ասում ա.— Դու ասիր, մենք էլ վեր թողինք:

— Ո՞ւմ ասի,— ասում ա,— ես:

Ասին, թե.— Քու նազիրդ քու տերօդորմիան բերուց, ասավ՝ վեր թողեք, մենք էլ վեր թողինք:

Տերօդորմիան էլ տալիս են իրան:

Կանչում ա նազիրին թե.— Ինչպես ա, որ դու էկել ես իմ տերօդորմիան գողացել, տարել ես վեր թողուլ տվել էդ տղին:

Դա օրթում ա ուտում, թե.— Ես բանե խաբար չեմ:

Դրանք միտքն են անում, թե՛ ես ինչպես բան ա: Ասում են, թե էդ տղի կշտին մի Դավրիշ կա, էդ Դավրիշն ա անում:

Թքավորն ասում ա.— Գնացեք էդ Դավրիշին բերեք ըստի:

Գնում են Դավրիշին ասում.— Թքավորը քեզ կանչում ա:

Դավրիշը ասում ա.— Ես թքավորի հետ գործ չունեմ:

Գնում են թքավորին ասում են, թե.— Գալիս չի՛:

Ասում ա.— Գնացե՛ք, բռնեցեք, կապեցեք ու բերեք:

Գնում են ասում, թե.— Արի՛, թքավորը անպատճառ ուղում ա:

Էլի գնում չի: Բռնում են դրան, որ կապեն. կոները բռնում են, կուռը պոկ ա գալի:

Թողում են գնում, թքավորին ասում.— Ըսենց գնացինք, բռնեցինք, կոները պոկ էկան:

Ասում ա.— Խո՛ սաղ ա, գնացեք ջանդակը բերեք:

Գալիս են տենում, որ հրես սաղ նստած մոխիր ա դուս տալի:

— Դավրի՛շ,— ասում են,— արի՛, քե թքավորը կանչում ա:

Դավրիշն ասում ա.— Ես թքավորի հետ գործ չունեմ:

Դրան բռնում են կոնիցը, որ գոռով տանեն՝ կուռը պոկ ա գալի, մեկել կոնիցն են բռնում՝ էն էլ ա պոկ գալի, ոտնիքն են բռնում՝ ոտն էլ ա պոկ գալի, գլխիցն են բռնում՝ գլուխն էլ ա պոկ գալի . մի քթոց են բերում, ջանդակը ածում քթոցի մեջ, շլակում, տանում: Գնալիս ճամփին մի

փեյնի վրա ջուր ա դառնում ու խշշալով թափվում փեյնի մեջը: Գնում են էդ մարդիկը թքավորին ասում, թե ըսենց բան է լավ:

Թքավորն ասում ա.— Հըլը գնացեք դավվրն էլեք ընդի:

Գնում են, տենում հլե ընդի մոխիրն էլի դուս ա տալի: Գալիս են թքավորին ասում, թե.— Էլի ընդի մոխիրն ա դուս թափում:

Թքավորը ինքը վեր կացավ, էկավ Դավրիշի մոտ, ասավ.— Դու ե՞ս էդ բաները անում:

Ասավ.— Ե՛ս եմ անում:

Ասավ.— Հըմի ի՞նչ անեմ քեզ:

— Լավն են ա,— ասավ,— ախչիկդ տաս էդ տղին:

Թքավորը համոզվեց, ախչիկը տվուց էդ տղին. օխտն օր, օխտը քշեր հրսանիք արին, նրանք հասան իրենց մուրազին, դու էլ հասնես քու մուրազին:

Չարն ընդի, բարին ըստի:

Աստծանե իրեք խնձոր վեր ընկավ. մինն՝ ասողին, մինը՝ լսողին, մինն էլ՝ ալամ աշխարհին: